

Minister mr. drs. Arthur Dowers:

“Cada dia Cuerpo Policial ta bira miho y comunidad ta hopi orguyoso di boso”

Na celebracion di 30 aña
Cuerpo Policial Aruba



ARUBA ta celebrando e di 30 aniversario di existencia di Cuerpo Policial Aruba e aña aki y e cuerpo a scoge pa conmemora e ocasion aki durante di e tradicional celebracion di Korpsviering/Korpsweek, cu ta un celebracion di amistad y hermandad entre Polisnan di e paisnan partner den Reino Hulandes y ta inclui e ex-partner di Reino, esta Surnam. E eventonan ta tuma lugar tur aña na di e paisnan cu ta participa n'e celebracion. E aña aki ta conta tambe cu presencia y participacion di agentenan policial for di Merca.

Minister di Husticia, Arthur Dowers a desea tur participante un caluroso bon bini, bendicion di Dios y un tremendo siman durante di e tradicional Santo

Sacrificio di Misa dialuna mainta. El a gradici Cuerpo Policial di Aruba, y di tur e otro paisnan partner, pa nan servicio na nan comunidadnan y a subraya e sosten di e sistema di husticia y di comunidad pa cu nan trabao.

Minister Dowers remarca cu aunke tin ocasionnan unda cu e agente policial por pensa of kere cu e ta para su so, en realidad y sigur esaki ta aplica pa Aruba, e ta para fuerte cu e sosten di su comunidad. “Cada dia Cuerpo Policial ta bira miho y comunidad ta hopi orguyoso di boso y di boso trabao y esfuerso nan”, e mandatario a laga sa.

Cu admiracion pa nan lucha contra crimen local y internacionalmente, y e

union cu ta existi entre e Cuerponan di Polis, Minister Dowers a expresa cu comunidadnan rond mundo ta bibando den temponan interesante y complica, unda cu criminalnan ta birando miho y mas efectivo den nan trabao y ta esencial pa tin mas union entre esnan apunta pa sirbi y proteha nos comunidadnan.

Ademas, ta hopi importante pa tin union entre lidernan den e sociedadnan, pero cu esaki tin biaha ta laga di desea, pa via di lidernan cu ta haci contrario di loke ta necesario y deseabel y ta scoge pa crea division y stimula mas violencia den nan comunidadnan.

E desunion crea ta refleha den un comunidad cu no ta dispuesto pa uni forsa pa

haci loke ta bon. Esaki t'e raiz di situacionnan lamentabel, Minister Dowers a bisa, agregando cu ta tristo pa bisa cu e polarisacion y yamada pa rebeldia aki ta hustamente t'e Polisnan cu ta traha na bienestar di e comunidad en general t'esnan cu ta haya nan mes confronta cu ne.

E mandatario a comenta cu e ta haya cu Polis su tarea awendia ta mas dificil cu e tabata 30 aña pasa, pero tambe ta reconoce cu tur tempo, tur aña y tur periodo tin su retonan.

E criminalnan y crimen en general cada dia ta miho organisa, y ta birando mas fuerte, pero ta un hecho cu mas malo e criminalnan bira, miho e Polisnan ta bira, segun Minister Dowers.

“Mas malo nan bira, mas bon nos ta bira”, el a ripiti

enfaticamente.

Minister Dowers a splica cu e lidernan ta compronde e importancia pa provee e material, ekiponan y tecnologia pa haci e trabao di Polisnan mas facil, miho y mas confortabel; pero cu no ta solamente e elementonan aki ta birando miho, pero por mira y confirma cu e Polis mes, e agente cu ta sali di su cas tur dia pa traha na interes y na servicio di su comunidad ta bira miho tambe.

E titular di husticia a conclui felicitando Cuerpo Policial cu nan di 30 aniversario, y pa nan bon trabao; y cu tur hunto e Polisnan di islanan BES, Sint Maarten, Corsou, Surinam, Hulanda y nan invitadonan di Merca gosa hopi di e actividadnan y celebracion tumando lugar e siman aki.